



Ang Kalihukan

National Democratic Front - Amihanang Sentral Mindanao

Tuig 27 | Gula 1 | Regular nga Isyu | Enero - Hunyo 2020



EDITORIAL

Ibutyag ug pakyason ang mga pasistang pakana sa rehimeng US-Duterte ginamit ang mga militaristang lakang kalambigit sa Covid-19!

Lahi ang *face mask* ni Duterte. Dili kini basta lang pangontra-*pandemic*. Pangilad kini nga maskara – ginatabunan ang pasistang dagway sa presidenteng ginapahimuslan ang kasamtangang krisis sa desperasyong matukod ang usa ka pasistang diktadurya.

PAKITANG-TAWO NGA PAGTUBAG SA KRISIS

Paspas nga nabutyag sa katawhan ang taphaw, aginod ug nagkaguliyang nga pagtubag sa gobyernong Duterte sa *pandemic*. Nagapabiling mapasagaron ug walay tin-aw ug komprehensibong plano ang gobyerno hangtud sa

kasamtangan. Aron tabunan ang kawalay-pagpakabana, bangis niining gipahamtang ang mga militaristang lakang sama sa *lockdown*-militar ug uban pang mga mapanumpuon pamaagi nga walay laing ginahatag kundili dugang pag-antus sa katawhan.

Tungod sa grabeng kakulang
“Ibutyag...” sundan sa palid 2

- 6 39 opensiba sa BHB-NCMR
- 7 Eskwelahan sa Canada, gisunog sa AFP-PNP
- 9 Kalihukan ug pagtinabangay atubangan sa Covid
- 12 Mensahe ni Ka Oris
- 15 Parangal sa mga Martyr

sa kahimanang-medikal, *mass testing, quarantine facilities*, mga medikal propesyunal ug mamumuong panglawas, kani-adtong Hunyo 18, mokabat na sa 1,108 ang namatay sa tibuok nasud, 33 niini mga doktor ug nars. 27,238 na ang kumpirmadong apektado, gikan sa dili pa motaas sa 200,000 pa lamang nga na-testing, ilabina sa hanay sa mga naglisud ug kabus-sa-syudad. Sa katapusang bahin sa Mayo, ikaduha ang Pilipinas sa pinakadaghang mga nangamatay sa tibuok Habagatan Sidlakang Asya.

Apan ang pondo nga gikinahanglan aron seryosong tubagon ang kasamtangang krisis panglawas, ipangutang pa.

Samot usab gipagrabe sa krisis sa Covid-19 ang dugay nang ulipnong kahimtang sa masang anakpawis. Ang kanhi nang naglisud ug gutom, samot nga nagaantus ug nagakutoy ang tiyan. Ang kanhi nang walay regular nga trabaho ug makabuhi nga suhol, samot nawadan og panginabuhi. Ang kanhi nang walay igong serbisyong sosyal, halos magpakilimos na og hinabang gikan sa panggamhanan. "Ipasalig ko, walay Pilipino nga mamatay tungod sa gutom," kini ang hinambog nga pamahayag ni Duterte.

Apan ang pondo nga gikinahanglan aron seryosong tubagan ang kasamtangang krisis pang-ekonomiya, ipangutang pa.

Samtang bilyun-bilyon na ang giwaldas sa rehimeng US-Duterte sa mga korap nga proyektong imprastraktura sama sa "Build, Build, Build", lakip na ang mga nagapabiling nakabuyangyang ug walay kahumanan nga mga tulay, karsada, pantalan, airport ug uban pa. Ingonman, luyo sa kasamtangang krisis sa Covid-19, hilabihan ka dakong pondo pa gihapon ang gigahin alang sa modernisasyon sa Armed Forces of the Philippines (AFP) ug uban pang galastuhang militar nga mokabat sa kapin P400 bilyon samtang pudyot lang ang gigahin nga badyet alang sa serbisyong panglawas nga P166.8 bilyon ug uban pang serbisyong sosyal. Nagapabilin sab nga pinakadakong kantidad (40%) sa tinuig nga nasudnong badyet ang awtomatikong gigahin sa utang-panggawas.

Mokabat na sa Php43 bilyon kada bulan ang ginapangutang sa gobyerno aron pondohan kining mga walay kapuslanan-sa-katawhang mga proyekto ug programa, o ginatantyang Php7.7 trilyon sa kinatibuk-an, nga ginabayran pinaagi sa dugang pagpabuhis sa katawhan. Ang kanhi na nga higanteng utang-panggawas,

labaw pang moburot ug dugang palas-anon sa katawhan tungod sa kasamtangang krisis sa pandemic. Samtang, dakong bahin sa bag-ong ipangutang ug sa buhis ilalom sa CITIRA igahin alang sa pagsalbar sa mga dagkong kumpanya aron maluwas kini sa pagkabangkarote.

Kung seryoso gyud ang rehimen sa pagtubag sa krisis, mahukmanon unta niyang gikibhangan ang pondo alang sa galastuhang militar, utang-panggawas ug taphaw nga mga proyektong imprastraktura aron dugangan ang higanteng kakulang sa mga *testing kit, quarantine facilities, medical equipment* ug uban pang hinanaling panginahanglan. Ingonman, aron tubagon ang makaluluoy nga pang-ekonomiyang kahimtang sa katawhan, ilabina kadtong mga nagsalig sa inadlaw'ng suhulan ug mga mamumuo ug empleyadong temporaryo o permanente nga



nawad-an og trabaho tungod sa krisis.

Dinhi sa rehiyon, kulang kaayo ang gigahin nga Php5,000 hangtud P6,000 sa matag pamilya alang sa Social Amelioration Program (SAP). Sa Bukidnon, nga usa unta sa mga tinubdan sa produktong pang-agrikultura sa nasud, nahiagom sa tumang pag-antos ang mga lumulupyo tungod sa kagutom ug kawalay kapanginabuhian. Labaw pang makapasilag nga atubangan sa grabeng krisis, kaylap pa gihapon ang korapsyon bisan sa *relief goods* ug *emergency funds* tungod kay gipaboran sa administrasyong Duterte ang mga kroni sa negosyo ug kadapig sa pulitika. Labaw sab nga gibati karon sa katawhan ang taas nga presyo sa mga batakang palaliton ug ang epekto sa nagdaus-os nga presyo sa humay-tipasi ug uban pang produktong agrikultural tungod sa kontra-katawhang mga balaod ni Duterte sama sa TRAIN Law ug Rice Tariffication Law.

Kung seryoso gyud ang panggamhanan, tagdon niini ang dugay nang panawagan sa katawhan nga ibasura kining mga makapalisud nga balaod. Apan ginapahimuslan pa hinuon niini ang kasamtangang krisis aron subling banhawon ug hataga'g-katarungan ang mga kontra-katawhang balaod sama sa Anti-Terrorism Bill, National ID System ug uban pa aron dugangan ang mga militaristang pagtubag sa krisis.

PASISTANG DAGWAY SA LIKOD SA MASKARA

Makapasilag ug angay lamang nga hugot kundenahon sa katawhan ang pagpahimulos ni Duterte sa kasamtangang krisis aron papaspason ug ipahanoy ang pagpatuman sa dugay na niyang pangandoy nga pasistang diktadurya.

Nagposturang diktador karon si Duterte sa gahum sa *emergency powers* nga gihatag sa iya sa iyang *supermajority* sa Kongreso. Pinaagi niini, anaa sa iyang kontrol ang binilyong pondo nga gigahin alang sa *crisis management*. Ingonman, aduna siya'y gahum nga kontrulon ang unsa mang pribadong kumpanya ug utilidad sa ngalan pa gihapon sa “pagseguro sa kahimsog-publiko”. Subli sab nga gipatumaw sa kasamtangan ang sugyot nga *charter change* ginamit ang pangatarungan nga gikinahanglan kunong amyendahan ang Konstitusyon aron mahimong mas epektibo ang pagpatuman sa *emergency powers* sa pangulo.

Labaw sab nga gipalawig ug gipalig-on ang ‘dili-deklaradong balaod militar’ sa tibuok nasud pinaagi sa bag-ong natukod nga Covid-19 Inter-Agency Task Force (IATF) ni Duterte. Ginapanguluhan kini sa pagkakaroon sa mga retiradong heneral nga mao usab ang naglangkob sa National Task Force to End Local Communist Armed Conflict (NTF-ELCAC). Gisakyan niini ang kahimtang aron labaw

pa'ng magsilbi ang tanang ahen-sya sa gobyerno, bisan ang mga sibilyan nga institusyon, alang sa militaristang kontrol batok sa katawhan ug sa rebolusyonaryong kalihukan, mas gipakusog ang pagpatuman sa mga “*focused military operation* (FMO)” sa AFP-PNP ginamit ang makailad nga mga “*community service program* (CSP)” sa mga komunidad ug baryo sa kabukiran, nga ginatago karon sa likod sa tabil nga krisis sa Covid-19. Samtang sa mga syudad, bulgar ug dayag na ang “*shoot-to-kill order*” ni Duterte ni kinsa mang mga magprotesta. Walay luwas bisan ang mga kaatbang ni Duterte sa pulitika. Kinsa mang dili mosunod sa dikta sa Malakanyang, ginaimbistigahan dayon, ginasilutan ug ginasumpo sa ngalan sa Covid-19 IATF.

Pagpamatuod kini nga taphaw ang unsa mang mga deklarasyon ni Duterte alang sa subling pag-abli sa panaghisgot pangkalinaw tali sa GRP ug CPP-NPA-NDF. Gawas pa, wala'g-tuo ang nahimong mga pagpanglapas sa rehimeng US-Duterte sa kaugalingon niining gideklarang hunong-buto niining Marso 14 hangtud Abril 15.

Kaniadtong Marso 15, paturagas nga gipamusil sa mga elemento sa AFP ang mga nagbakwit nga residente gikan sa Sityo Canada, Barangay San Vicente (Balagnan), Esperanza, Agusan del Sur samtang pauli na unta sila gikan nangumpra sa ilang mga panginahanglan. Sa samang adlaw, unom ka mag-uuma ang gidakop sa militar ug wala pa gipakita hangtud sa kasamtangan.

Napugos pagbakwit ang mga residente sa Sitio Canada tungod sa grabeng militarisasyon sa lugar. Apan wala na silay ka-ulian nga mga panimalay ug kapanginabuhian. Kaniadtong Marso 16, tungod sa padayon nga paglunsad og mga operasyong kombat sa nahisgutang erya luyo sa hunong-buto, nagka-***misencounter*** ang mga tropa sa AFP ug PNP nga nagresulta sa mga kaswalti sa ilang kaugalingong han-ay. Isip balos-atake, gipangsunog sa mga tropa sa kapulisan ang mga gibiyaang balay ug kabtangan sa mga nagbakwit nga residente, lakip na ang ilang pang-elementaryang eskwelahan nga gitukod sa usa ka simbahan.

Kaniadtong Marso 18, gireyd sa mga elemento sa 8th IB sa AFP ang usa ka kampo sa NPA sa Sitio Bendum, Brgy. Busdi, Malaybalay, Bukidnon. Gisundan pa kini og mga serye sa pagpamomba sa Philippine Air Force ug 4th ID sa mga kasikbit nga komunidad sa mga Lumad sa Sitio Mandahikan, Brgy. Canangaan, Cabanglasan, Bukidnon kaniadtong Marso 27 ug Marso 29.


Matud usab sa taho sa mga residente, padayon ang pagdag-sang sa mga pasistang tropa ug operasyong militar sa mga barangay sa Bukidnon: Barangay Kibongcog ug Barangay Poblacion, San Fernando; Barangay Concepcion, Valencia; Barangay Bulonay ug Barangay Kalabugao,

Impasug-ong; Barangay Santa Filomena, Quezon; Barangay Busdi, Caburacanan, Manalog; Barangay Saint Peter ug Barangay Zamboanguita, Malaybalay City; Barangay Poblacion, Cabanglasan; ug, sa Agusan: Sitio Balatakan, Barangay Guinabsan, Buenavista, Agusan del Norte ug Esperanza, Agusan del Sur. Nakapunting usab ang mga kanyon sa Sitio Nursery, Barangay Concepcion ug Sitio Salaysay, Barangay Santa Filomena.

Samtang pinaagi pa gihapon sa pangtabon-sa-buslot sa mga CSP, gigamit sa militar ang krisis sa Covid-19 aron labaw nga makapanghilabot sa mga komunidad ug baryo. Sukad nibusikad ang ***pandemic***, dili moubos sa unom ka bag-ong CAFGU detatsment ang gitukod sa mga pasistang tropa sa

Barangay Durian, Las Nieves, Agusan del Norte; Sitio Kipunay, Barangay Eureka, Gingoog City, Misamis Oriental; Sitio Hinandayan, Barangay Kamagong, Nasipit, Agusan del Norte; ug, Sitio Mahayag, Barangay Namnam, San Fernando, Bukidnon. Plano usab nga tukuran sa Barangay Balagnan, Esperanza, Agusan del Sur. Samtang, nagpahigayon usab og CSP sa Barangay Kalabuan, Esperanza, Agusan del Sur ug Sitio Lakbangan, Barangay Minalwang, Claveria, Misamis Oriental.

Tin-aw nga prayuridad pa gihapon sa rehimeng US-Duterte ang todo-gera batok sa rebolusyonaryong kalihukan ug katawhan luyo sa krisis sa Covid-19. Dili sinsero ang mga panawagan ni Duterte alang sa “kalinaw” ug “panaghiusa”, nahukasan na siya sa maskara.



ANG PANAWAGAN SA PARTIDO SA TANANG REBOLUSYONARYONG PWERSA UG KATAWHAN

Luyo niining tanan, nagapabiling determinado ang rebolusyonaryong kalihukan nga dugang magpreserba sa kaugalingon, magpakusog sa tanang bahin, pakyason ang ilusyon sa rehimeng US-Duterte nga kaya niini nga dugmukon ang armadong rebolusyon ug i-isa ang gubat sa katawhan sa mas taas nga angang.



Sukad pa kaniadtong gideklara ang balaod militar sa Mindanao hangtud sa gipasubsob nga mga FMO sa rehiyon sugod 2018 hangtud sa kasamtangan, wala natandog sa kinatibuk-an ang NPA ug rebolusyonaryong kalihukan sa rehiyon. Unsamang mga pagpangilad ug pakana, gamitan man og lain-laing maskara, dili kanus-a man magmadaugon ang rehimeng US-Duterte nga pakyason ug ipasurender ang rebolusyonaryong kalihukan.

Karon, atubangan sa krisis sa COVID-19 samtang padayon ang mga gipakusog nga pasistang atake sa rehimen, nagkahiusa ang tanang rebolusyonaryong pwersa ug katawhan sa rehiyon sa panawagan sa Partido nga labaw nga magpakusog, maghiusa ug mosalig sa hiniusang paglihok sa katawhan. Dugay nang napamatud-an sa kasaysayan nga bugtong ang kolektibong paglihok ang tubag sa unsa mang krisis nga dugang magpaantus, manumpo ug magpahimulos sa katawhan.

Gimandoan sa Partido ang tanang yunit sa NPA, ilabina ang mga yunit medikal niini, nga maglunsad og lapad nga kampanyang panglawas sa han-ay sa masa aron maka-

tabang sa pagpugong sa pagkaylap sa Covid-19, lakip na ang kampanyang edukasyon, nutrisyon ug sanitasyon sa mga komunidad. Hatagan og espesyal nga pagtagad ang adunay gihambin nga sakit ug atimanon ang masakiton, ilabina ang mga edaran, bata ug mabdos.

Angayan lamang ang pursigido nga pagpanghingusog sa masang lumulupyo alang sa paspas, sarang ug organisadong tabang gikan sa reaksyunaryong gobyer-

no. Kadungan niini, gikinahanglang magpursigi ang tanang yunit sa NPA ug rebolusyonaryong pwersa sa gimbuhatong produksyon aron matubag ang pang-ekonomiyang panginahanglan sa masa ug sa iyang hukbo. Sa susamang higayon, angayang ipatuman sa katawhan ang pagtinabangay panahon sa pag-atubang sa krisis ilabina sa kahimtang nga hilabihan kakulang ug kanihit ang mga hinabang sa gobyerno.

Sa wala pa mobusikad ang krisis sa Covid-19, dugay na ang hilabihang diskontento sa katawhan sa kapakyas sa rehimeng US-Duterte nga tubagon ang mga batakang panginahanglan sa katawhan, ilabina sa panahon sa kalamidad ug katalagman. Karon labaw kanus-a pa man, mas ginalauman nato ang pagulbo sa kasuko ug pagkasilag sa masang anakpawis sa mapasagaron, korap, traydor ug tiranikong rehimeng US-Duterte.

Atubangan sa hilabihang kalisdanan tungod sa krisis sa Covid-19, nanawagan ang Partido sa tanang katawhan nga maglunsad sa tanang porma sa pakigbisog. Dungan-dungan natong batukan ang nagkagrabe nga pasismo sa estado. Ipaasang nato ang gubat sa katawhan aron lumpagon ang nagkadunot nga rehimeng US-Duterte, ipabarog ang tinuod nga demokratikong gobyerno sa katawhan ug tukuron ang usa ka masanag nga sosyalistang ugma. **AK**

BALITANG TO



41 opensiba, gilunsad sa BHB-NCMR

GILUNSAK SA BAGONG Hukbong Bayan - NCMR ang lain-laing porma sa taktikal nga opensiba batok sa mga berduhong tropa sa Armed Forces of the Philippines ug Philippine National Police. Sukad Enero 2020, mikabat sa 41 ka opensiba ang nalunsad sa BHB-NCMR.

Sa Bukidnon, gi-ambush sa usa ka platun sa BHB ang mga nag-operasyong tropa sa 8th IB ug 2nd DRC sa Sityo Bendum, Barangay Busdi, Malaybalay City kaniadtong Mayo 19. Mokabat sa walo ka sundalo ang patay samtang luwas nga naka-widro ang BHB.

Kaniadtong Mayo 22, gi-ambush sa usa ka iskwad sa BHB-Bukidnon ang mga tropa sa AFP sa Sityo Tigbaw, Brgy. Cawayan, San Fernando. Nasayran nga naglingaw-lingaw ang maong mga sundalo sa usa ka spring human sa operasyon niini sa Barangay Magkalungay. Patay ang duha kanila, lakip ang ilang aktibong kutay, ug laing unom ka sundalo ang samaron.

Gipabusikaran usab og *command detonated explosive* (CDX) sa BHB ang mga tropa sa 56th ug 60th IB nga nag-operasyon sa Sityo Tapayanon, Barangay Canangaan, Cabanglasan, Bukidnon kaniadtong Marso 24, alas-6 sa buntag. Sa taho sa BHB-Bukidnon, upat ang patay ug lima ang samaron sa maong aksyon.

Kaniadtong Enero 30, alas-6 sa buntag, gi-ambush usab sa BHB-Bukidnon ang nagbyahe nga sakyanan sa PNP-Regional Mobile Force sa KM 26, Barangay Ticalaan, Talacag. Patay sa maong aksyon si Corporal Roel Sumaylo samtang samaron silang PCapt. Ramil Gighe, SMsgt. Giovani Malinab ug Cpl. Jerwin Genilla.

Sa Agusan del Norte, gi-atake sa BHB ang mga tropa sa 23rd IB sa Matino Range, Barangay Ginabsan, Buenavista kaniadtong Abril 21. Patay sa maong opensiba ang duha ka regular nga sundalo ug usa ka CAFGU nga si Arman

Manggumihay.

Sa samang barangay, gilunsad usab sa BHB-Agusan ang duha ka serye sa atake batok sa 23rd IB kaniadtong Abril 14 sa Sityo Balatacan, Barangay Ginabsan. Sa kinatibuk-an, mikabat sa upat ang patay sa han-ay sa kasundaluan.

Sa Misamis Oriental, giatake sa mga Pulang manggugubat ang mga tropa sa 58th IB sa Sityo Linabo, Barangay San Juan, Balingasag kaniadtong Pebrero 24. Usa ang patay sa sundalo samtang laing usa usab ang samaron.

Sa maong mga aksyon, mokabat sa 73 ang kaswalti sa han-ay sa kasundaluan ug kapulisan, kung asa 47 kanila ang patay samtang 26 ang samaron. Sa pikas bahin, mabayanihon usab nga gihalad sa 23 ka Pulang manggugubat ang ilang kinabuhi sa maong mga panagsangka. **AK**



MGA SALIN sa eskwelahan sa Sityo Canada human kini gisunog sa AFP-PNP.

Eskwelahan ug mga balay sa Canada, gisunog sa AFP-PNP; 6 ka residente, missing

GISUNOG SA MGA sakop sa Philippine National Police - Special Action Forces (PNP-SAF) ug Armed Forces of the Philippines (AFP) ang eskwelahan ug tanang balay sa Sityo Canada, Barangay San Vicente, Esperanza, Agusan del Sur niadtong Marso 18, 2020. Sa samang higayon, wala pa usab gipalugwa hangtud sa kasamtangan ang unom ka residente nga gi-kidnap human sa pagpanunog.

Halos mga abo na lang ang nabilin sa eskwelahan samtang makita ang mga salin-salin sa mga gamit sa pagtudlo, sama sa libro ug mga papel, nga gipangbungkag ug tinuyo nga gipangguba. Makita usab dinhi ang mga nabilin nga basura sa mga sundalo ug pulis, lakip

na ang ilang mga uniporme, *dextrose*, basiyo sa *butane gas* ug uban pa. Gitukod ang maong eskwelahan sa usa ka relihiyosong grupo ug mao na ang nagsilbing tulungaan sa mga kabataan sa Canada.

Naugdaw usab ang 15 ka balay sa baryo. Bangis nga gipangsunog bisan ang mga kahimanan sulod sa balay.

Pagkahuman sa pagpanunog, gipanumba usab sa mga sundalo ug pulis ang mga punuan sa prutas nga marang sa komunidad aron makatugpa ang ilang helikopter.

Sa wala pa kini nahitabo, nasayran nga dunay upat ka sibilyan ang gipamusil sa kasundalohan kaniadtong Marso 15. Matud sa

usa sa mga biktima nga nakaikyasa sa panghitabo, gipasanginlan kuno sila sa mga sundalo nga membro sa NPA.

Pagka-ugma, Marso 17, adunay nahitabong misencounter tali sa mga tropa sa AFP ug PNP duol mismo sa Sityo Canada. Gikan pa sa mismong komunidad ang mga tropa sa PNP. Nasayran nga kapin kon kulang 10 ang kaswalti sa maong panagsangka. Human niini, mibalik ang mga tropa sa kapulisan sa baryo ug dinhi na sab nagkampo hangtud nahuman ang pagpanunog sa mga kabalayan.

Hangtud sa kasamtangan, wala pa gihapon nakabalik ang mga residente sa Sityo Canada tungod sa kalisang human sa panghitabo.



Naugdaw nga mga balay sa mga residente sa Canada.



Gipangsunog ug gipangguba nga mga gamit sa eskwelahan



Uniporme sa pulis nga nabilin sa gisunog nga eskwelahan



Mga kalihukang masa ug pagtinabangay taliwala sa krisis sa Covid-19

Labaw pa nga nagkacusog ug nagkapaspas ang mga inisyatiba sa katawhan ilalom sa nagkagrabeng krisis sa Corona Virus Disease 2019 (Covid-19). Gipatuman nila ang lain-laing aksyon aron malingkawas sa tumang kagutom. Gipamatud-an nila nga bugtong ang ilang panaghiusa lamang ang tinuod nga makasulbad sa krisis sa panglawas, ekonomiya, panginabuhian ug pulitika ug dili ang mini, taphaw ug kamot-nga-puthaw nga mga lakang sa reaksyunaryong gobyerno.

Nakaangkon og kadaugan ang mga residente sa usa ka baryo sa Esperanza, Agusan del Sur sa ilang ekonomikanhong pakigbisog. Gikan sa P250, nitaas og 25% o ngadto sa P300 ang suhulan alang sa mga hurnal sa maong baryo. Gisalmutan ang maong kalihukan sa 35 ka indibidwal ug nakabenepisyo ang tibuok baranggay nga naglunsad sa maong suhulan.

Sa samang higayon, taliwala sa gipa-istrikto ug gipabangis nga mga paghikling sa mga residente, giduso sa masa ang kolektibo ug tagsa-tagsang pagsubida gikan sa mga sentrong lungsod ug syudad ngadto sa kabukiran aron makapadayon sila sa pagpanguma. Gipahigayon ang unang hugna niini sa siyam ka pamilya sa usa ka baryo sa Misamis Oriental kung asa midangop sila sa mga bukirong bahin tungod kay wala na silay makaon kung magpabilin sila sa sentrong bahin sa probinsya. Gisundan kini sa laing bul-og sa mga residente gikan sa duha ka baranggay sa

Impasug-ong, Bukidnon.

Sa duha ka baranggay sa Bukidnon, nagpatuman usab og mga inisyatiba ang mga masa aron makaatiman sa ilang mga umahan. Sukad sa pagpatuman sa 'lockdown,' gihatagan lamang og tulo ka oras ang mga residente nga makagawas sa ilang mga baryo ug kung dili sila makabalik sa maong gitakdang panahon, pagadakpon na sila sa mga gimontar nga tsekpoynit sa kasundalohan. Tungod niini, gisubay sa mga masa ang tipong-hunglos nga pag-ugmad sa ilang mga umahan. Sulod sa tulo ka oras, hunglusan o tabangan sa mga residente ang usa ka uma aron paspas kini nga maatiman. Dungan-dungan usab ang ilang pagpatuman niini aron dali ra sila nga magkasinuportahanay kung ugaling adunay mangdakop sa ila.

Sa La Paz ug Talacogon, Agusan del Sur, gisiguro usab sa mga masa nga magkatinabangay sila sa pagpundar og uma.

Nagbinayloay sila sa ilang mga similya sa saging ug lubi aron masiguro nga dunay lain-laing tanom ang matag komunidad.

Aduna usay usa ka baranggay sa Impasug-ong, Bukidnon kung asa, sa 200 ka pamilya, 50 lang ang nakadawat sa SAP. Nagdemanda ang 150 ka pamilya ug ilang gikalampag ang lokal nga panggamhanan ug napresyur kini nga ihatag ang ilang ayuda.

Sa mga hilit nga bahin, ilabina sa mga komunidad sa lumad, gipatuman usab nila ang tradisyunal nga pagkwarantinas. Kanhi pa lang, ginapahigayon na sa mga lumad ang boluntaryong pagpahiklin o ang ginatawag nila nga 'pangalasan'. Ginasubay kini kanhi sa mga masang lumad panahon nga adunay gakyaplap nga mananakod nga sakit, sama sa kolera/eltor ug tipdas, sa ilang komunidad. Dako ang kalahian sa maong tradisyunal nga kwarantinas sa ginapatuman sa gobyerno tungod kay mas epektibo kining makapalikay kanila sa unsamang sakit. Labaw kining napanghingusog sa masang lumad atubangan sa kawalay pagtagad sa ilang batakang serbisyo sa gobyerno.

Sa kasyudaran, nag-inisyatiba

"Kalihukan...," sundan sa palid 10



“Kalihukan...,” gikan sa palid 9

usab ang mga estudyante sa usa ka kolehiyo aron makapakaylap og impormasyon kabahin sa Covid-19. Lakip sa maong inisyatiba ang pag-endorso sa mga gustong magpatambal ngadto sa mga kaila nga doktor o nars sa maong mga estudyante.

Kahinumduman nga sa dihang nagsugod ang lokal nga transmision sa Covid-19 sa Pilipinas niadtong Marso 14, 2020, gipahamtang usab ni Rodrigo Duterte ang *community quarantine* (pagkwarantinas sa tibuok komunidad) nga nagkinaiya sa pag-*'lockdown'* o pagsirado sa mga sentrong lungsod ug syudad. Gimobilisa ni Duterte ang iyang mga pulis ug sundalo aron pugngan ang mga tawo nga makapanarbaho sa umahan o makapalit og pagkaon. Hangtud sa kasamtangan, gilaraw sa rehimen nga kanunay magpuyo

sa kabalaka ug kagutom ang masa.

Tungod niini, naobliga ang katawhan nga mobarog, hiniusa nga molihok ug magtinabangay aron pugngan ang pagkaylap sa sakit ug iduso sa gobyerno ang obligasyon niining maghatag og ayuda panahon sa krisis. Gani, natukmod usab silang momugna og mga kolektibo nga mga lakang tungod sa kawalay pagtagad sa estado sa ilang mga batakang panginahanglan.

Sa pikas bahin, padayon usab nga nakalunsad ang BHB sa iyang mga nag-unang tahas, lakip na ang gimbuhatong medikal ug edukasyon sa han-ay sa masa. Nakapahigayon ang mga yunit sa BHB og mga pagtuon kabahin sa Covid-19. Gitukod nila ang komite sa panglawas alang sa pagsiguro nga malikayan ang mananakod

nga sakit. Aduna usay mga pagbansay medikal pinaagi sa Batakan ug Intermidyang Pagtuon sa Panglawas. Tungod na usab sa gisingating kawad-on ug kagutom sa masa, giabagan sa mga yunit sa Partido ug BHB ang mga lumulupyong sa mga eryang ilang ginalihukan. Lakip na niini ang pagpakusog sa kampanya alang sa pag-uma ug paghatag og hinabang alang sa pagmontar ug pagmentine sa mga umahan nga mahimong tinubdan sa pagkaon.

Gisiguro sa mga yunit sa BHB nga mapahigayon ang ilang mga aktibidad subay sa giladid sa World Health Organization nga mga protokol alang sa Covid-19 sama sa pagmentine sa *social distancing*, pagsuot og *face mask*, temporaryo nga dili paglamano ug uban pa, ilabina kung makigkita sa masa. **AK**

UNSA ANG MGA ANGAY BUHATON PANAHON SA KRISIS SA COVID-19?



1 **Padayong palambuan ang mga umahan sa likuran** aron kini ang mosuporta sa adlaw-adlaw nga panginahanglan.



2 **Ilunsad ang kaylap ug subsob nga gimbuhatong edukasyon** ngadto sa han-ay sa masa lakip ang kabahin sa nutrisyon ug sanitasyon.



3 **Kanunay magsuot sa mga personal protective equipment** sama sa facemask, gwantis ilabina kung makig-istorya sa ubang tawo.



4 **Ipabiling lig-on ang immune system o ang sundalo sa lawas** pinaagi sa pagsiguro sa **nutrisyon** (pagkaon sa mga sustansyadong pagkaon) ug **sanitasyon** (kalimpyo sa lawas yg palibot).



5 **Ikinabuhi ang pagtinabangay ug kolektibong paglabang sa krisis** ilabina atubangan sa kawalay-pagtagad sa reaksyunaryong gobyerno.


Mopursige sa pakigbisog ug kumprehensibong isulong ang gubat sa katawhan sa mas taas nga ang-ang!

Ka Oris

Tigpamaba,

New People's Army - National Operational Command

Marso 29, 2020 | Mensahe atol sa ika-51 nga anibersaryo sa NPA



Gisaludohan sa Partido Komunista ug Nasudnong Kumand sa Operasyon ang tibuok ginsakpan sa NPA tungod sa iyang mga natampo sa atong nakabot nga mga kadaugan sulod sa miaging 51 ka tuig sa pagsulong sa gubat sa katawhan sa atong nasud. Gipasidunggan usab nato ang tanang martir sa ilang walay kinutubang paghalad sa ilang kinabuhi para sa katawhan ug sa Rebolusyon. Gipasidunggan usab nato ang halapad nga katawhan sa ilang mapangahasong pagsalmot ug walay pagkutat nga pagpaluyo sa NPA ug sa kinatibuk-ang rebolusyonaryong armadong pakigbisog.

Sulod sa 51 ka tuig, naabot nato kini nga yugto sa atong pakigbisog nga wala madugmok luyo sa damgo-sa-adlawng-tutok sa nagkalain-laing reaksyunaryong rehimen gikan ni Diktador Marcos hangtud sa kasamtangang rehimen US-Duterte. Gikan sa halos wala niadtong 1969, nga naglihok lang sa usa ka distrito sa probinsya sa Tarlac, karon duna nay liboan ka sundalo sa

katawhan ang NPA, nga nakatag sa halos tanang probinsya sa tibuok nasud.

Sa paglunsad ni Duterte sa iyang gubat batok sa rebolusyonaryong kalihokan, nanganti siya nga sulod sa usa ka tuig iyang puuhon ang atong pwersa. Apan napakyas kini, mao nga iyang giinat nga sa sulod daw sa iyang termino mapapa na ang rebolusyonaryong kalihokan. Apan bisan pa man kung midugang kini'g 17 ka batalyon sa AFP, daghang mga *drones*, *bomber planes*, *jets* ug helikopter, ug 12 ka 155mm nga kanyon, ang mga timailhan nagpakita nga dili gyud matuman ang iyang hinungog nga pangandoy. Segurado kita nga dili gyud mapugngan sa rehimen US-Duterte ang pagsulong sa gubat sa katawhan sa atong nasud. Usa kini ka dakung kadaugan nga atong nakabot, nga ikapasigarbo ug angayang saulugon.

Tungod sa kapakyasan sa bahad, mihirit na usab ang butangeronang Duterte nga sa dili pa matapos ang iyang termino pakunhurong

niya'g daku ang atong pwersa. Apan ning halos duha na lang ka tuig sa nabiling panahon niya sa poder - kana kung dili siya mahimong diktador - tinaw ang mga timailhan nga dili gihapon siya molampos sa iyang damgo. Saksi kita karon dinhi ning hawan sa tunga sa lasang nga daghan pa ang mga NPA nga nagpadayon sa pakigbisog aron makabot ang pangandoy sa halapad nga katawhan alang sa nasudnong demokrasya, ug moabante ngadto sa usa ka sosyalistang katilingban. Mabuhi ang Bagong Hukbong Bayan!

Niining miaging 51 ka tuig, gawas sa kadaugan nato sa pagpreserba sa atong pwersa atubangan sa bangis nga atake sa kaaway, ubay-ubay usab ang atong mga kadaugan sa ubang natad:

Sa natad sa pagtukod sa base, namintina nato ang relatibong halapad nga mga sona ug baseng gerilya, bisan pa man kung dunay pagkunhod sa gilapdon ug giladmon sa mga napundar natong base. Nalunsad usab

nato ang agraryong rebolusyon nga direkta ug dili direkta nga mihatag sa benipisyo sa mga mamumuong panguma, kabus, ug tunga-tungang mag-uuma. Nalunsad usab nato ang mga dayag nga pakigbisog batok sa pasistang pangatake ug kalapasan sa tawhanong katungod sa rehimeng US-Duterte. Karon nag-atubang si Duterte sa usa ka kasong kriminal sa internasyunal nga korte tungod sa iyang pagpamatay sa mga suspetsadong *drug addict* ug mga pulitikal nga aktibista nga mokabat kapin kun kulang sa 30 ka libo. Nalunsad usab nato ang mga anti-imperyalistang kalihukan; partikular nga nalunsad nato ang mga kalihukan sa mga mamumuo, kabatan-onan ug hatungang pwersa sa kasyudaran ug kalungsuran.

Apan dili kita angay magpakuntento sa kadaugan sa pagreserba sa atong pwersa, kinahanglang atong kumprehensibong isulong ang rebolusyonaryong armadong pakigbisog sa mas taas nga ang-ang.

Kinahanglang himoong kaylap ang atong agraryong rebolusyon ug patas-on ang ang-ang niini aronmasmokusogangsuportang masa diha sa pagpalambo sa base ug pagsulong sa armadong pakigbisog. Kinahanglang mas palapdon ug palig-onon nato ang atong base aron matagamtam nato ang halapad nga suportang masa ug mas modaghan pa gyud ang mosampa sa hukbo. Kinahanglang iasdang nato ang armadong pakigbisog sa mas taas nga ang-ang pinasikad sa nagkalapad ug nagkalalom nga baseng masa, ug kaylap nga agraryong rebolusyon. Kinahanglang palapdon ug paglig-unon

nato ang nagkahiusang prente batok sa mapitulong giingong “*whole-of-nation approach*” ug NTF-ELCAC sa rehimeng US-Duterte. Kinahanglang palapdon ug palig-onon nato ang atong Partido aron makabaton kini sa igong katakus sa pagpangulo sa rebolusyonaryong pakigbisog ngadto sa mas taas nga yugto.

Kini ug daghan pang mga mayor nga tahas ang angayan natong himoon.

.....

Gikinahanglan nato ang pagkumbina sa kinatibuk-ang linya sa DRK ug sa partikular nga linya kalambigit sa COVID-19

.....

Apan samtang nag-atubang kita sa mga gimbuhaton alang sa kumprehensibong pag-asdang, karong bag-o ug sa kasamtangan, ang Partido, NPA ug Nagkahiusang Prente, nagatubang sa usa ka hinanaling hagit kalambigit ning usa ka talagsaong pangkalibutang suliran sa sakit nga COVID-19. Gikinahanglan nato ang hinanali nga *adjustment* sa atong mga programa ug pryoridad samtang padayong gi-huptan ang pangkinatibuk-ang tahas alang sa rebolusyonaryong pag-asdang.

Unsaon nato paglugar sa atong pulitikanhong pagpangulo, pagkigdugtong sa katawhan ug paggiya kanila diha sa kinabuhi ug kamatayon nga pakigbugno ning katilingbanong katalagman?

Giaturbang nato ang limitasyon sa pisikal nga kontak sa masa ug halapad nga katawhan tungod sa panginahanglan sa “*social distancing*”. Usa ka dakung hagit alang kanato kung unsaon nga dili mahimong bale-wala o walay papel ang rebolusyonaryong kalihukan sa pag-atubang sa krisis ug hingpit nga molampos ang reaksyonaryong gobyerno sa pagpatuman sa mga kontra katawhan nga mga lakang ginamit ang krisis sa COVID-19.

Kinahanglang mahimong mamugnaon ang mga komite sa Partido unsaon paghupot ang tukmang pulitikanhong pagpangulo sa kinatibuk-an ug sa partikular nga kahimtang. Gikinahanglang nato ang pagkumbina sa kinatibuk-ang linya sa DRK ug sa partikular nga linya kalambigit sa COVID-19. Sa pikas bahin, naa ang panginahanglan kung unsaon nato paggiya ang atong mga kadre ug tanang Pulang manggugubat aron mandam ang ilang kaugalingon diha sa padayong pagsalmot sa pag-atubang ning talagsaong katalagman. Nga ang dakung panginahanglan nga makadugtong dayon kanila aron madawat ang ilang mga report, maka-analisa sa kahimtang ug makapadangat sa atong giya.

Alang sa matag-usa kanato, naa ang hagit kung unsaon nato pagdawat ang kahimtang ug kamatuoran, ug pagpailalom sa atong indibidwal nga interes diha sa kolektibong pag-atubang sa suliran sa COVID-19, sama pananglit sa: kalisdanan sa kahimtang sa kanihit sa pagkaon, medisina, kakulang sa mga himan personal; kabalaka sa atong mga pamilya nga nabulag sa ato; ug kung unsaon nato paghibalo sa ilang kahimtang.

Kinahanglang palapdon ug paladmon nato ang atong pagsabot nga kining tanan molabay sa tukmang panahon (kana kung duna nay madiskubre nga tambal sa COVID-19), ug busa angayan kitang mag-antus ug huptan ang pasensya hangtud nga makatugot na ang kahimtang. Sa hinanali ug praktikal nga kahimtang, unsaon nato nga makasustinir ang atong pundo ug suplay sa pagkaon, medisina ug uban pa.

Kinahanglang ilunsad ang kampanya sa panguma sa han-ay sa masa aron naay ilang masandigan taliwala ning pagkakarong krisis ug aron makabaton sila sa katakus nga makatampo sa panginahanglan sa ilang hukbo. Ang “pagpalambo sa malingkawasnong ekomomiya” mao gihapon ang atong giya sa paglunsad sa kampanya.

Ang mga yunit kinahanglang matngon sa pag-uma karon dayon aron human sa tulo ka bulan dunay maani na ug makunhoran ang pagsalig sa pamalit gikan sa gawas. Ikumbina ang independente nga umahan ug umahan uban sa masa. Pamalit sa suplay sa pagkaon, medisina ug uban pang panginahanglan samtang nagpaabot nga ma-ani na ang mga umahan. Kinahanglan nga mag-stock kita’g suplay igo-igo nga ikalahutay samtang wala pa nato maani ang atong mga umahan. Kinahanglang isistimatisa ug pakusgon ang suportang masa, pero mag-agad usab kini sa katakus sa masa.

Dili pa tino kung kanus-a makahimo’g tambal batok sa COVID-19, lagmit nga sa

sunod nga unom ka bulan dili pa masulbad kini nga krisis. Mahimong modagan pa kini sa usa ka tuig, busa daku ang hagit kanato karon unsaon nga makapreserba sa pwersa samtang pangulohan ang masa. Kaya nato kini kung dugang ipahugot nato ang rebolusyonaryong diwa sa pag-alagad sa katawhan ug paglahutay taliwala sa sagubangon natong kalisdanan.

Atong hinumduman nga wala kita makigbisog aron lang magkinaugalingong mabuhi, o alang lang sa atong kaugalingon, kun di labaw sa tanan kinahanglang makabaton kita’g igo-igo kusog aron makapadayon sa pagpangulo ug pagtabang sa katawhan diha sa pag-atubang sa ilang gisagubang nga kalisdanan karon. Huptan nato ang batakang kinaiya sa hukbo isip usa ka pwersa sa pakig-gubat, usa ka pwersa para sa gimbuhatong masa ug moabag sa pagpanguma sa masa. Kinahanglang kumprehensibo nato nga makumbina kini nga tahas sa atong hukbo.

Taliwala sa kalisdanan isalikway nato ang madulom nga panglantaw, kining atong kalisdanan nga atubangon molabay ra human sa usa ka panahon, samtang ang pagpadayon sa atong mga tahas sa rebolusyon taas-taas pa ang atong labangon. Kung mahimong madulom o ngitngit ang atong pagtan-aw sa atong kahimtang karon, unsa pa kaha kung atong lantawon ang hataas, liku-liku ug tunukon nga dalan paingon sa hingpit nga kadaugan?

Busa, mga kauban, ihikling usa

nato ang sigpit nga panglantaw para sa kaugalingon, sa pamilya, sa klan, ug sa ginagmayng grupo. Atong dugang palig-unon ug palapdon ang pagtan-aw sa kinatibuk-ang interes sa katawhan ug sa rebolusyon. Magtinabangay kita ug kolektibo natong labangon kining gisagubang nato nga kahimtang, samtang hatagan usab nato sa igong pagtagad ang pagsulbad sa pangpersonal, o pangpamilyang suliran subay sa ikatugot sa kahimtang ug gimbuhaton.

Isip mga rebolusyonaryo, nasayod kita nga naa kanato ang masukulong diwa, ang determinasyon, ang kamatinud-anon sa pagtuman sa mga tahas atubangan ning talagsaon ug tumang kalisud nga kasamtangang kahimtang. Kining gipannumpaan natong tahas ug diwa atong huptan ug ibandera hangtud nga malampasan nato kining lumalabay ra nga krisis ug samtang nangandam sa mga tahas ug gimbuhaton aron kumprehensibong ias dang sa mas taas pa nga ang-ang ang gubat sa katawhan.

Mabuhi ang tanang ginsakpan sa NPA!

Mabuhi ang NPA!

Mabuhi ang Nagkahiusang Prente!

Mabuhi ang Partido nga naggiya sa NPA!



PAGHANDUM

sa mga Rebolusyonaryong Martir

Ginahatag sa tibuok rebolusyonaryong kalihukan sa North Central Mindanao ang pinakataas nga pagsaludo sa mga rebolusyonaryong martir nga silang Ka Sidlak, Ka Rio Amor “Lima” Yuson, Ka Gladys Joy “Andi” Hiponia, Ka Brendo, Ka Bandi, Ka Gab, Ka Mialyn, Ka Jim, Ka Yaw, Ka George, Ka Lahi, Ka Diego, Ka Lance, Ka Reboy, Ka Santom, Ka JL, Ka Jayson, Ka Jovanni ug sa lain pang lima ka kauban. Sila ang maayong kadre sa Partido ug manggugubat sa Bagong Hukbong Bayan nga mabayanihong mihalad sa ilang kinabuhi sa lain-laing aksyong militar sa rehiyon sulod niining tuiga.

Maisugon nga giatubang sa mga bayaning martir ang mas gipasubsob ug gipabangis nga operasyong militar sa rehiyon. Gani, tali sa 23 ka mga martir, 17 kanila ang kaswalti gikan sa hugaw ug magun-ubong pagpamomba sa kahanginan sa AFP.

Kaniadtong Pebrero 18, gihalad ni Ka Sidlak ang iyang kinabuhi human sila gibundakan sa mga dagkong bomba sa 1st SFB sa ilang kampo sa Barangay Lilingayon, Valencia City.

Kaniadtong Mayo 10, gibombahan sa mga yunit sa 23rd IB ang temporaryong kampo sa BHB sa Sityo Kidahon, Barangay Malinao, Gingoog City. Gamit ang FA-50 *jetfighter*, gihulog niini ang 226.8 kilo nga mga bomba. Niini, mabayanihon nga na-martir si Ka Lima, Ka Andi, Ka Brendo, Ka Tapilak, Ka Gab, Ka Mialyn, Ka Jim, Ka Yaw, Ka George, Ka Lahi, Ka Diego ug laing lima ka kauban.

Kaniadto usab Marso 6 hangtud Marso 17, namartir silang Ka Lance, Ka Reboy, Ka Tomas “Santom” Ampuhon ug Ka Gim human sa lain-laing hugna sa encounter tali sa mga tropa sa AFP.

Kaniadtong April 30, namartir usab si lang Ka JL, Ka Jayson ug Ka Jovanni human nila na-engkwentro ang mga tropa sa 26th IB.



Ka Rio Amor “Lima” Yuson

Tubong Balingoan, Misamis Oriental si Ka Lima. Sa dihang nag-eskwela na, sa Cagayan de Oro na siya nagpondo. Nitungha siya sa Xavier University sa

“
Linibo ka linibong martir
ang mabayahinong
mitahan sa ilang
kinabuhi alang sa
katawhan; taas natong
ipabarug ang ilang
bandira ug momartsa
kita sa dalan nga natina
sa ilang dugo!”

- Mao Zedong

kursong *BS Civil Engineering*.

Napukaw si Ka Lima sa nasudnon demokratikong pakigbisog kaniadtong 1996 sa dihang nahimo siyang membro sa usa ka ecumenical o Kristiyanong kalihukang estudyante sa iyang eskwelahan.

Nahagit siya panahon sa paghaguros sa balud o pagkusog balik sa kalihukang kabatan-onang estudyante ug sa tibuok kalihukang masa sa urban sa CDO atol sa paningkamot panahon sa Ikaduhang Bantugang Kalihukang Pagtul-id nga nag-sugod niadtong 1992.

Sa dagan, padayong nagtuki

si Ka Lima sa iyang maayong matampo sa rebolusyonaryong pakigbisog. Nagpasakop siya sa Kabataang Makabayan. Sa kadugayan, naimbitahan usab siya sa Partido ug nahimo siyang membro niini.

Nakasalmot siya sa paspas ug dinagkong kampanya kontra *Tuition Fee Increase* ug protesta aron iduso ang demokratikong katungod sa mga estudyante sulod sa eskwelahan. Nakasalmot sab siya sa mga *basic masses integration* sa komunidad sa urban poor, mga welgang bayan sa kadalanan, mga cultural play sa eskwelahan, mga rali ug uban pa.

Soft spoken, hinayon, *low profile*, *silent worker* nga tipo si Ka Lima, apan hait ug paspas siya maka-organisa tungod kay mainantuson, walay kakapoy siya sa pag-paloap, pagprop sa masang estudyante, tuyok-tuyok sa mga departamento sa eskwelahan hangtud na sa suuk-suok nga mga boarding house sa mga estudyante ug uban pa. Seryoso ug dasig siya sa pagpatuman sa mga tahas, apan bungisngis usab makig-istorya sa mga kauban nga suod na niya.

Mga tuig 2000, nagdesisyon siyang mag-pultaym sa kalihukang kabatan-onan-estudyante isip organisador kung asa lakip sa iyang gilihukan mao ang mga eskwelahan sa CDO. Sa mga mosunod nga tuig, subay sa panginahanglan, gi-deploy siya isip organisador sa mamumuo ug *urban poor* una sa CDO ug sa wala nadugay gibalhin siya sa Iligan City sa susama gihapong mga sektor.

Pagka-2006, nakahukom si Ka Lima nga mas ipataas pa ang iyang pagsalmot sa rebolusyon ug misampa siya sa BHB uban sa iyang bana nga si Ka Omar. Una siyang naglihok sa Front 89 ug nabutang siya sa usa ka Sandatahang Yunit Pang-propaganda. Human sa pila ka tuig, gihimugso ni Ka Lima ang ilang bugtong anak.

Kaniadtong 2009, lakip si Ka Omar, sa mga namartir sa panagsangka sa Zamboanguita. Human niini, gibalhin si Ka Lima sa sentro de grabidad sa nataran hangtud sa unang kwarto sa 2012.

Nahimong membro si Ka Lima sa SRC kaniadtong 2011. Pagka-2018, nahimo dayon siyang membro sa Komite sa Rehiyon sa NCMR.

Naminyo pag-usab si Ka Lima kaniadtong 2016 sa usa ka kaubang hukbo. Aduna silay usa ka anak sa maong kauban.



Ka Gladys Joy "Andi" Hiponia

Gipanganak si Ka Andi sa San Fernando, Bukidnon ug naggikan siya sa hut-ong adunahang mag-uuma. Nagtungha siya kanhi sa Central Mindanao University ug gikuha ang kursong *BS Animal Science*.

Nagdako si Ka Andi sa pyudal nga pagdumala sa iyang ginikanan. Dili siya makahimo og iyang

kaugalingong desisyon tungod kay mag-agad ang tanan sa iyang amahan.

Nakonektahan si Ka Andi sa-dihang nitambong siya sa gipatawag nga tigom sa usa ka yunit sa BHB sa ilang lugar alang sa pagtuon sa PADEPA kaniadtong 2011. Nahuptan pag-ayo ni Ka Andi ang iyang mga natun-an nga kapanginahanglan sa pagsukol ug sa armadong pakigbisog aron ilingkawas ang katawhan sa kalisod. Tungod niini, nakaamgo siya nga mosampa sa Pulang hukbo. Mao kini ang higayon nga mibarog siya sa iyang kaugalingong desisyon. Kanunay lig-on si Ka Andi sa pag-atubang sa kontradiksyon tali sa pagpamunlot sa iyang pamilya.

Mibarog si Ka Andi isip usa sa mga mapangahasong *medical officer* sa BHB. Nahimo siyang kandidatong membro sa Partido kaniadtong ulahing bahin sa 2011 ug nahimong hingpit nga membro pagka-2012.

Kaniadtong Setyembre 2013, adunay nahitabong panagsangka tali sa mga Pulang manggugubat ug kasundaluhan. Daghan ang nasamdan ug adunay usa ka kauban nga grabe ang samad. Niini nga panghitabo, labaw pa'ng napalig-on ang determinasyon ni Ka Andi nga barugan iyang tahas aron mapataas pa ang kinabuhi sa mga kauban.

Nahimong membro si Ka Andi sa seksyon kaniadtong 2013 ug, sa dagan, nahimo siyang medikal sa subrehiyon kaniadtong 2014. Dinhi, nasalmutan niya ang dugang nga mga kasinatian isip

medik. Naminyo si Ka Andi kaniadtong 2015 sa usa usab ka Pulang manggugubat. Sa sayong bahin sa 2017, gihimugso ni Ka Andi ang ilang anak nga lalaki.

Pagka-Hunyo 2017, nahimong membro si Ka Andi sa *regional medical staff* sa rehiyon. Lakip siya sa mga nagpasiugda nga masiguro ang pagpataas sa katakus sa mga *medical officers* sa lain-laing ang-ang pinaagi sa mga teoretikal ug praktikal nga pagbansay. Kaniadtong 2018, lakip si Ka Andi sa mga medik nga nag-atiman sa mga kaubang nasamdan human sa panagsangka. Pagka-2019, aduna kauban nga pasyente nga ilang naluwas gikan sa grabeng samad tungod sa pagkabali sa gusok niini.

Sa paglabay sa panahon, nasugatan ni Ka Andi ang problema kabahin sa iyang pamilya. Taliwala niini, nahimo siyang maayong modelo sa kalig-on ug paglahutay. Kabilin ni Ka Andi ngadto sa mga kaubang kababayan-an ang pagbarog ug padayong pagkamadasigon sa pagpatuman sa mga tahas atubangan sa mga ginaatubang nga personal nga suliran. Gani, ginagahinan niya og panahon ang paghatag og tambag sa mga kaubang babae nga nakasagubang usab og problema sa pamilya.

Kugihan ug pursigido si Ka Andi sa iyang tahas. Kung adunay pasyente, iya kining unungan hangtud nga maulian. Kanunay niyang mapabati sa mga kauban nga anaa siya aron motabang ilabina panahon sa kapit-os. Aktibo usab siya sa pagpasiugda

sa mga pagbansay-medikal. Gani, kaniadtong Mayo 10, nagkatapok sila aron ilunsad ang Intermidyang Pagtuon sa Panglawas.

Isip kauban, dali usab nga masuod si Ka Andi tungod sa iyang pagka-istoryador. Nahimo pa nga asoy panalagsa nga “Kung naay kusog nga tingog, naa gyud na si Andi dinha.”

Gawas sa gimbuhatong medikal, taas usab ang katakus ni Ka Andi sa gimbuhatong edukasyon. Lakip siya sa mga rebolusyonaryong instruktur sa kursong pang-Partido. Kanunay niyang makuha ang atensyon sa mga kaubang tumutuon tungod sa iyang naglanug-lanog nga tingog.



Ka Renato “Sidlak” Tilucan

Natawo si Ka Sidlak sa probinsya sa Bukidnon gikan sa hut-ong mag-uuma. Ubos nga ang-ang lamang sa edukasyon sa burgis nga eskwelahan ang iyang naabot.

Nisampa si Ka Sidlak sa BHB kaniadtong 2005. Naila siya sa mga kauban isip Watiwit, Tumbao ug Sidlak.

Pagka-2008, gipasa siya sa laing yunit ug niining tuiga usab siya nahimong kandidatong membro sa Partido. Pagka-2009, nahimo na siyang hingpit nga membro sa Partido. Sa maong yunit, si Ka Sidlak ang nagbarog isip iskward lider ug vice platoon leader.

Nahimong vice-CO si Ka Sidlak sa iyang nahilunaang nataran pagka-2012. Human sa duha ka tuig, nahimo siyang membro sa subrehiyon ug siya ang nagbarog nga vice-CO sa operasyunal nga kumand sa subrehiyon (SROC).

Kaniadtong 2015, gitukod ang usa ka independenteng platon ug si Ka Sidlak ang gihimong platon lider niini.

Sa 2016, gidala ni Ka Sidlak ang iyang tibuok platon ngadto sa pikas nga subrehiyon aron didto maglihok. Pagka-2018, siya ang nahimong CO sa iyang nahilunaang nataran ug vice-CO sa SROC.

Aktibosi Ka Sidlak sa pagpasiugda og mga bansay-militar sa BHB. Nahashasan usab siya sa gubat pinaagi sa mga nasinati niya nga mga opensiba. Sa bisan unsang panagsangka, si Ka Sidlak ang kauban nga dili gayud mamiya sa kauban.

Ginasaluduhan si Ka Sidlak sa mga kaubang rebolusyonaryo sa iyang pagbaton sa unsamang tahas nga isangon kaniya. Dili siya malimtan sa iyang pagkasuod sa mga kaubang hukbo ug sa iyang pagka-siawan.

Naminyo si Ka Sidlak sa usa ka kaubang hukbo kung asa aduna silay duha ka anak.

*Ginahandom usab sa masa ug sa mga kauban ang mga maayong tampo sa uban pang rebolusyonaryong martir niining tuiga ug sa milabay pa'ng mga katuigan. Dili matupngan ang inyong pagka-dili makikaugalingon ug ang inyong hingpit nga pag-alagad sa katawhan. Molanog pa kaysa sa unsamang bomba ang inyong pagkamabayanihon ug himuon namo kining sumbanan alang sa padayong pagpaasdang sa gubat sa katawhan. **AK***